

# Powšitkowne WOZJEWJENJA

njedźelu, 15. septembra 2013

## Dźiwadło pod hołym njebjom w Róžeńće

Přeprašujemy wšitkich wutrobnje na dźiwadłowe předstajenje pod hołym njebjom z titulom „Róžant – legendy, fakty, ludžo“, spisane wot Jurja Kocha. Wone předstaji so tutu njedźelu, 15. septembra, w 20.00 hodź. třeći a posledni raz w Róžeńće za cyrkwu. Přihladowarjow wočakuje zajimawy přehlad stawiznow hnadowneho městna Róžanta.

Prosmy wo to, zo njebyšće awta we wsy wotstajili, ale jenož při putniskej luce. Parkowanskich městnow budže dosć. Přijězd na parkowanišćo budže jenož ze wsy móžny. Ławki za něhdže 600 přihladowarjow su nastajene. Štóž chce, smě sej swójski stoł sobu přinjesć.

*Ralbičansko-Róžeńčanska gmejna, nošerka projekta*

## Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprašuje tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 29. septembra, w 14 hodź. w Chrósćicach na luce při Hatkach.

## Jězba do Zehrena pola Mišna

Na pućowanje po slědach swjateho Bena a wotkrywanje dalších zajimawostkow kónčiny mjez Drježdžanami a Mišnom přeprašuje Dekanatne dušepastyrstwo džěći 5. a 6. lětnika wot pónđzele do štwórtka, 21. do 24. oktobra. Za jězbu zběra so wot kóždého wobdźělnika přinošk we wysokosci 60 eurow. Zajimcy njech so prošu hač do pónđzele, 6. oktobra, pod telefonowym čisłom (03 57 96) 8 87 07 we Worklecach přizjewja.

## Spominanje na Antona Nawku

We wobłuku 35. swjedženja serbskeje poezije zarjadowuje Ludowe nakładnistwo Domowina štwórtk, 19. septembra, w 19.30 hodź. čitanje a bjesadu k česći Antona Nawki w Budyskej Smolerjec kniharni na Sukelnskej 27. Džeń pozdžišo, pjatk, 20. septembra, w 11 hodź. přeprašuje Zwjazk serbskich wumělcow skladnostnje 100. narodnin Antona Nawki na spominanje při jeho rowje na Budyskim Mikławšku. Wšitcy zajimcy su wutrobnje přeprašeni.

## Serbskorěčne eksercicije w domje Wysoke duby

Maće hišće jedyn džeń dowola? Mam namjet, kak móhli jón wužić k wočerstwjenju a připódlu so nasrěbać duchownych mocow. W Drježdžanskim eksercicijnym domje Wysoke duby wotměja so wot štwórtka, 10. oktobra, wječora hač do njedźele, 13. oktobra, připołdnja eksercicije za serbskich wěriwych. Jezuitski pater Willi Lambert kurs přewjedže. Modlitwy a kěrlušy su serbske, přednoški němske. Nimo toho su tam přijomne stwy, dobra kuchnja a krasna wokolina k wuchodžowanju. Zajimcy njech so telefonisce přizjewja pola mje pak na Chrósćanskej farje, telefonowe čisłó (03 57 96) 8 04 00, abo mobilnje (01 51) 10 27 95 88.

*Marija Clausenowa*

## Ekumeniski nyšpor w Drježdžanach

Serbja w Drježdžanach, jich přiwuzni a přećeljo su přeprašeni na ekumeniski nyšpor sobotu, 21. septembra, w 15 hodź. do cyrkwy swjateho Józefa w Drježdžanach-Pieschenje, Rehefeldska 61. Po nyšporje ze superintendentom Janom Malinkom budžetej swačina a serbska bjesada. *Marjana Bubnarjec*